

# Alla regina suonda l'imperatoura

En teater musical, concerts classics e per sa legrar sen Pasca ena gronda ovra da Johannes Brahms. Chegl cumpeggia igl program d'anviern tgi Origen è preschento ier a Riom.

GION NUTEGN STGIER/FMR

I seia ansomma betg per sasez da pudeir preschentar en program d'anviern cultural ainten chel taimp signia dalla pandemia, è detg *Giovanni Netzer*, igl intendant digl Origen Festival Cultural. I fiss er pussebel tgi a curta vista seia da renutzgier allas producziuns. Er cun chel scenari chintan el e sies team. Proximamaintg ins scumainza cun las provas pigl teater musical deditgia all'imperatoura Irene da Byzanz, ella tg'è stada egna dallas grondas figuras digl Imperi roman oriental.

## Saltunzs e saltunzas dalla classa superioura

Gist otg gedas vign preschento aint igl meis da favrer igl teater musical ainten la tor cotschna sensom igl Pass digl Gelgia. L'impera-

toura Irene è betg l'amprema donna roiala tgi viseta igl pass. Na, gio igl 2010 veva Giovanni Netzer insceno en bavagnaint statal per la regina da Saba ed incanto igl public cun chel teater sot tschiel avert. Ossa vign messa an pled e maletg, cun solt e cun cant la veta singulara dall'imperatoura Irene da Byzanz. Ella sa cumparagleva gugent cugl imperatour Carl igl Grond er per mussar la sia pussanza. Er chella vign ad esser aint igl teater musical ena part essenziala. Cun l'inscenaziun tschertga Giovanni Netzer er da far la punt dalla pussanza dall'impertoura tar la pussanza digl gronds schefs da stadi digl taimp preschaint. *Silvia Azzoni* la saltunza ed igl saltunz *Thiago Bordin* digl ballet da Hamburg, *Edward Loyd*, *Torry Trautmann* e *Bonni Paskas* segnan pigl solt. Igl tenor *Maximilian Vogler* e l'altista *Marian Dijkhuizen* dattan agl toc igl dretg

tung cun lour cant. La premiera è igls 8 da favrer 2022. I suondan anc set ulteriouras preschentaziuns. Pigls costums segna eneda dapple *Martin Leuthold*, el tg'è ena corifea schi vo per urden fegn e per moda eleganta.

## Igl requiem tudestg


Ainten la «Clavadeira» a Riom vignan la pianista *Alena Sojer* ed igl cellist *Joachim Müller-Cröpon* a sunar las pi belas melodias tgi schean ad ella ed ad el a cor. Igl madem vala er pigl tenor *Maximilian Vogler* tgi canta cun passiu cumposiziuns da Franz Schubert. *Marian Dijkhuizen* ella vign ad allegar igl auditori cun melodias da ples cumponists digl taimp passo e digl preschaint. Dus emdas avant Pasca è da santeir ainten la tor cotschna igl Ensemble vocal d'Origen, sot la direzziun da *Clau Scherrer*. Igl 32 omens e las donnas interpretschan quatter gedas l'ovra «Ein deutsches Requiem» da Johannes Brahms, bagn egna dallas grondas ovras digl cumponist tudestg.

## Anc anfignen alla fegn d'otgover 2023

La tor cotschna sensom igl Pass digl Gelgia, chella svanescha igl otgover 2023, è menziun Giovanni Netzer. Gio ossa ins fetscha ponderaziuns tge tgi succeda cun chella. El s'occupa er cugl tema tge tgi chegl monta per Origen sainza la tor, ella tgi seia tuttegn s'avanzada siva digl 2017 tar ena marca pigl festival cultural e per las bleras producziuns. Aint igl fra-taimp vegia la tor ena derasaziun internaziunala. Coreografs, saltunzs, saltunzas, cantadours e cantadouras, tots steman la tor e tschertgan er chella per sa preschentar agl public.

## Sen bunga veia

Giovanni Netzer è detg tgi cun la sanaziun e cun la reconstrucziun digl hotel Liun agls Mulegns ins seia sen la dretga veia. Anfignen ossa seian nias investus dus milliuns francs. Las proximas investiziuns montan a 3.2 milliuns francs. Cun la finanziaziun ins seia vedlonder e sen bunga veia. Renovadas vignan las tgombas, i dat ena nova cuschna ed en nov scoldamaint. La fegnameira è da retschever la stad 2022 igls amprens giasts aint igl hotel Liun. Sano vign er igl bietg vigl dalla posta, noua tgi la recepziun digl hotel vign ad esser aint igl avigneir. Sen bunga veia è er igl project dalla tor cun esser la Scola politecnica federala da Turitg vedlonder cun la construcziun digl amprens elemaints da betun. La collaboraziun cun la «ETH» seia fitg bunga, constructiva ed amperveva, è punctuo Giovanni Netzer. El è er da bunga speranza tgi igl suveran da Surses sustigna la midada da zona agls Mulegns per tgi la tor dastga neir construeida e per introduceir ena zona da cultura e cutier agls Mulegns. Igl 7 fa favrer decida la radunanza communal per u cunter chella midada da zona.



Segl program stat ainten la tor cotschna sensom igl Pass digl Gelgia igl proxim favrer en teater musical.

FOTO BENJAMIN HOFER

## SPORT

### Premiera ad Adelboden

Pacas emdas siva la fundaziun digl fan club digl skiunz *Sandro Simonet* è igl club organiso en viadi ad ena cursa dalla coppa mundiala da skis. Pigl fan club è chel viadi sto la premiera. Dumengia passada ègl sto schi gliunsch e la dumang bod è igl bus cugls fans partia da Casti an direzziun Adelboden. Gio bagnmarvegl è l'atmosfera stada fitg bunga e mintgign sa legrava da passantar en bel de anmez igls blers fans da skis ainen la Surselva bernesa. Per la gronda part digls fans da Sandro Simonet è igl slalom dalla coppa mundiala sto ena premiera cun mai aveir vasia anfignen ossa ena cursa agl li. Adelboden è an tottas modas e manieras adegna en'aventura cun esser l'ambianza avant, durant e siva dallas cursas fitg singulara ed er atgna. La relaziun tranter igls fans è fenomenala. Igl fans festiveschan lour idols an cuminanza e sa legran er schi la concorrenza segls skis è pi ferma. Chegl è er stada la concorrenza da Sandro Simonet dumengia passada ad Adelboden, cun crudar or igl skiunz da Casti aint igl sagond percurs. Pigls fans dad el, all'antschatta bagn ena pitschna desillusun. Chella è pero stada angal da curta

dirada cun sa legrar la delegaziun da Surmeir er digls bungas resultats digls oters skiunzs svizzers ed ameis da squadra da Sandro Simonet. Igl skiunz sez on igls fans betg antupo, chegl perveia dallas maseiras da covid-19. Per men-

ziunar, igl mument è igl fan club gio 70 members e commembras. (fmr/gns)

S'annuntgier per davantar commember digl fanclub da Sandro Simonet è pussebel per mail: fanclub.sandrosimonet@gmail.com.



Da bunga luna ad Adelboden: igls fans digl skiunz Sandro Simonet.

FOTO MAD

## PLANEIRAS

### Success pigls indigens

Onn da giubileum: per la 25avla gEDA è gia li la cursa da passlung per giuvenils sonda, igls 8 da schaner 2022 sen la Luziuswiese a Lai. Tenor comunicaziun allas medias è igl club indigen LLC Bual Lantsch cun treis victorgias gia igl pi grond success. Chegl èn stas numnadamaintg: *Jon Andri Fröhlich* (U10), *Gianna Lucia Fröhlich* (U12) e *Chiara Fröhlich* (U14). Las cundiziuns èn stadas extraordinarias: neiv, suglegl, ena temperatura da neiv da 0 grads ed ena temperatura dall'aria da minus 5 grads. Tuttegn èn sa participos 152 unfants e giuvenils dad 8 anfignen 20 onns per mussar lour abilitads sen lunghezzas tranter 1,2 km (U8) anfignen 11,4 km (U20). (cdm/fmr)

## LAI



Nov directour turistic dalla regiun da vacanzas da Lai: Philipp Vassalli.

FOTO MAD

### Dalla Bassa ainten las muntognas

*Philipp Vassalli* surpeggia da nov la direzziun dall'organisaziun turistica dalla regiun da vacanzas Lai. El suonda a *Bruno Fläcklin*, tgi redutgescha igl sies pensum da labour perveia da muteivs da sanadad. La regiun da vacanzas da Lai totga an Svizra tar egna da chellas destinaziuns turisticas tg'è gudagnea igls davos onns popularitad. Gist tigl giast svizzer è la regiun sa fatg en bung nom. Chegl conferma er tgi digl domber digls giasts tgi fon vacanzas a Lai e conturn dereivan passa 80% dalla Svizra. En grond marret tgi la regiun da vacanzas da Lai è oz ena veira marca è er l'organisaziun da turissem, la Lai Marketing Support SA. Igl 2013 è Bruno Fläcklin surpiglia da *Manfred Fiegl* la direzziun da chell'organisaziun e mano chella cun bier angaschamaint, saveida e passiu. Ena malsogna maligna è alloura freno avant dus onns l'activitad digl directour turistic da Lai e conturn, uschia tg'el è sa decida da sa retrer per la fegn digl 2021 da chel post. Bruno Fläcklin resta commember dalla direzziun dalla Turissem Management Organisaziun e segna cò pigl svilup da products e purscheidas. Alla direzziun da chella organisaziun appartigna er *Marc Schlüssel*, el tgi resta venavant substitut digl magnagestiun e segna er aint igl avigneir pigl marketing, per la comunicaziun e per l'organisaziun digls events.

Successour da Bruno Fläcklin davainta Philipp Vassalli, el tg'è 41 onns e dereiva digl cantun Turitg. Anfignen ossa è el sto magnagestiun dalla gruppa EUROBUS ed avant sto responsabel per la direzziun dalla Welti-Furrer SA. Igl econom da menaschi ed absolvant dall'universitad da Turitg è experientscha chegl tgi per totga vendita, marketing e direzziun. El dei d'esser en grond amei dallas muntognas e digl turissem. La regiun da vacanzas da Lai seia an chella tgossa ena regiun cun anc dapple potenzial, gea schizont ena destianziun tgi vegia la basa per davantar ena destianziun da turissem digl antier onn. Philipp Vassalli antscheva la sia nova piazza igl zarcladour da chest onn. *Domenico Bergamin*, el tg'è mano igls davos dus onns la direzziun dall'organisaziun turistica ad interim bandunga la Lai Marketing Support SA per surpiglier la direzziun dall'Allegra Turissem.

Remarcabel è bagn er tgi segl inserat per la tschertga digl nov directour turistic dalla regiun da vacanzas da Lai è s'annutzgeidas 70 persunas. La schelta seia ansomma betg stada schi simpla, cun esser tranter las annutzgas bleras e bungas candidaturas, è detg Daniel Stiefel, igl president digl cunsegl d'administraziun dalla Lai Marketing Support SA. (fmr/gns)

FMR